

## ARLeF: trê bants pe promoziun de lenghe furlane intal spettacul, inte editorie e inte ricercje scientifiche

*Tiermin par presentâ lis domandis: ai 4 di Jugn, 180 mil euros i fonds a disposizion. 20 mil euros destinâts ae realizazion di fiction in marilenghe*

La ARLeF (Agjenzie Regjonâl pe Lenghe Furlanie) e à publicât **trê bants trienâi** (2018-2020) pe promoziun de lenghe furlane intai setôrs dal **spetakul, de editorie e de ricercje scientifiche**. I impuarts metûts a disposizion a son, pal 2018, tal ordin: 70 mil euros, 60 mil euros e 50 mil euros, **par complessîfs 180 mil euros**.

Duncje, par 70 mil euros, e ven finanziade la realizazion di ativitâts di promoziun dal status de lenghe furlane cun spettacui teatrâi par fruts (25 mil euros); la organizazion di une manifestazion di cjant par fruts (20 mil euros) e la produzion, organizazion e distribuzion di un o plui spettacui teatrâi (25 mil euros).

Pe editorie, a son previodûts finanziaments pe realizazion e/o implementazion di programs informatics pal insegnament de lenghe furlane intes scuelis dal oblic e pe relative ativitât di formazion (30 mil euros); la realizazion di *fiction*, documentaris e altris oparis audiovisivis di cualitât in lenghe furlane, cun ancje la lôr difusion e divulgazion (20 mil euros); la produzion e la emission di une transmission radiotelevisive in lenghe furlane dedicate ae storie furlane (5 mil euros) e la realizazion e la difusion di un audiolibri in lenghe furlane par fruts (5 mil euros).

Infin, pe ricercje scientifiche, dut il finanziament disponibil (50 mil euros) al ven destinât ae ricercje, racuelte, compilazion, catalogazion, documentazion, sperimentazion cun ancje difusion e formazion relativis al corpus de lenghe furlane. A puedin vê i contribûts sedi i ents publics che i privâts (fondazions, associazions e ents cence fin di vuadagn, impresis e societâts). Pai materiâi scrits al è domandât l'ûs de grafie uffiâl de lenghe furlane.

Lis domandis a varan di rivâ **dentri di misdî (12.00) dai 4 di Jugn dal 2018**, cun spediçion esclusive vie PEC ae direzion [arlef@certgov.fvg.it](mailto:arlef@certgov.fvg.it). I obietîfs specifics di ogni bant e lis modalitâts di presentazion des domandis si puedin consultâ tal sît [www.arlef.it](http://www.arlef.it). Altris informazions si puedin domandâ al numar 0432.555847, o scrivint ae direzion di pueste eletroniche: [francesca.andrioli@regione.fvg.it](mailto:francesca.andrioli@regione.fvg.it)

*Udin, ai 3 di Mai dal 2018*

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: [arlef@caltpr.it](mailto:arlef@caltpr.it)**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<